



SENTIASA solat dan berdoa mohon keampunan daripada-Nya atas dosa silam yang pernah kita lakukan.

Gapai kebahagiaan hakiki ikut garis panduan Islam

Terus berusaha cari cahaya keimanan, bersih jiwa

**Nik Salida
Shuhaila**

saidasuhaila99@yahoo.com



APABILA ada segelintir umat Islam yang terlalai sehingga sanggup memperdagangkan akidah, ia bukan menjadi tanggungjawab individu itu semata-mata untuk kembali ke pangkal jalan, tetapi juga menjadi tanggungjawab sosial masyarakat di sekeliling untuk membawa mereka pulang.

Negara memainkan peranan lebih besar sama ada melalui undang-undang atau menggalakkan pembinaan budaya menghormati agama Persekutuan dan penganutnya untuk memastikan umat Islam istiqamah dengan pegangan agama serta tidak membiarkan seruan agama lain memesonkan akidah.

Perlembagaan Persekutuan memberi jaminan dan perlindungan undang-undang kepada setiap warga Muslim supaya tidak diposongkan akidah melalui apa cara pun. Perkara 11 (4) Perlembagaan Persekutuan memperuntukkan larangan penyebaran agama lain kepada penganut Islam.

Hak kebebasan beragama di Malaysia seperti termaktub dalam Perkara 11 hanya terpakai kepada penganut agama lain kerana peruntukan sama memberi kuasa kepada kerajaan negeri dan persekutuan untuk menyekat pengembangan agama lain di kalangan penganut Islam di Malaysia.

Hai ehwal orang Islam juga dikawal selia Parlimen yang bertanggungjawab menggalak undang-undang (Perkara 3 (5)). Mahkamah Syariah mempunyai bidang kuasa ke atas perkara membabitkan akidah dan pegangan agama.

Malah, mahkamah sivil umumnya juga menyerahkan bidang kuasa kes berkaitan keluar dari agama Islam kepada mahkamah syariah yang sudah tentu tidak akan mem-

biarkan sesiapa pun murtad.

Sudah namanya manusia, sering melakukan kesilapan dan kesalahan. Ada disengaja, ada pula tidak disadari tetapi akhirnya mengorbankan akidah dan menduakan Tuhan. Tidak terkecuali, ada yang suka mempersenda hukum Ilahi.

Kehidupan di dunia penuh dugaan dan cabaran memungkinan kita berbuat apa saja untuk memuaskan nafsu yang tidak baik. Walaupun cuba mengawal diri dari tipu daya, ada kalanya kita tertewas apatah lagi jika balasannya lambat tiba, tidak terasa janji Allah itu akan sampai akhirnya.

Benar manusia boleh dibohongi tetapi bukan Dia Yang Maha Kuasa. Sebab itu negeri akhirat itu pasti, kepada yang tidak menisiasikan kehidupan di dunia dengan kezaliman terhadap diri sendiri, pasti kegembiraan ditunggu tetapi jika sebaliknya tentulah balasannya tidak tertanggung.

Akal yang dikurniakan Allah SWT untuk berfikir supaya kita tidak mengulangi kesalahan serupa sehingga menggagalkan misi dan visi hidup di dunia. Mana yang hak dan mana yang batil, sendiri memillihnya, yang halal dan haram jangan dikompromi sehingga menjadikan hati kita buta.

Walaupun cuba menjadi hamba yang baik dan taat, ada kala kita lalai dan terlupa. Kata hati tidak semuanya memihak kepada kebenaran, bahkan boleh membuka pekung di dada. Justeru, segala keterlanjuran terhadap Yang Esa jangan sampai kita tidak bertaubat, jika ingin selamat di akhirat.

Menyesali dosa yang dilakukan



*Jangan pula taubat
dipermainkan dengan
mengulangi dosa
dan kemungkaran*



dan berazam bersungguh-sungguh untuk tidak mengulanginya adalah usaha perlu dilakukan jika benar-benar ingin bertaubat. Usah dikingan masa lalu jika itu membuatkan kita terus 'merindui' kejahatan dan kemaksiatan, sebaliknya kenang ia sebagai pengajaran yang tidak mungkin akan berulang.

Allah SWT berfirman yang bermaksud: *"Wahai orang beriman! Bertaubatlah kamu kepada Allah dengan taubat nasuha, mudah-mudahan Allah akan menghapuskan kesalahan kamu dan memasukkan kamu ke dalam syurga yang mengalir di bawahnya beberapa sungai."* (Surah At-Tahrim, ayat 8)

Jangan pula taubat dipermainkan dengan mengulangi dosa dan kemungkaran. Sesiapa ingin bertaubat mesti menyesali dosa dan bertekad tidak mengulanginya lagi. Ini dikatakan menyucikan diri, menghilangkan segala kotoran di hati kepada pembersihan jiwa sebenar.

Kita juga harus berjanji untuk mengelak daripada melakukan dosa. Sebolehnya hidup hendaklah dipandu dengan garis panduan dimuktamadkan oleh Allah SWT dan Rasul-Nya yang sememangnya membantu kita menggapai kebahagiaan hakiki.

Apabila hati sudah memperoleh cahaya, segala dosa ingin dibersihkan dengan rela, ini masanya kita perlu terus berusaha. Penangguhan boleh menggagalkan hasrat untuk meminta pengampunan daripada Yang Esa.

Usah kita tangguh peluang, kerana ajal juga bila-bila masa akan datang dan syukur jika kita sempat menyetarai dosa dan kejahatan kerana kita tidak akan melakukannya berulang-ulang. Yang paling penting, jangan berputus asa, selagi tidak menutup mata, pintu taubat sentiasa terbuka.

Penulis ialah Pensyarah Kanian Fakulti Syariah dan Undang-Undang Universiti Sains Islam Malaysia, kini melanjutkan pelajaran di United Kingdom